

darinnen gesegnet / Er wird auch solchen Segen gne-
diglich zur Welt geben vnd bescheren. Tröstet euch
ewres lieben HERREN Jesu Christi / der auch ein
kleines Kindlein vnter Wütterlichem Herzen gele-
gen / ewerer Leibesfrucht die stelle geweihet vnd ge-
heiliget / welcher auch hernach vmb vnser willen hat
viel gelitten vnd ausgestanden / vnd damit vnser
Sünde gebüßet / vnser Creutz vnd Leiden / vnd also
auch ewre jetzige grosse noth vnd schmerzzen gemiltet
vnd gelindert / Christus ist ewer lieber Bruder vnd
Immanuel / Er hat ein hertzliches mit leiden mit euch /
Er ist ewer fürsprecher bey seinem Himlischen Vater /
Er verbittet euch jtz in diesen grossen nöthen.

Der Heilige Geist ist ewer Tröster / Er giebet
ewerm Geist zeugnüs / daß ihr Gottes Kind seid /
Rom. 8. Er schreyet jtz in ewerm Herzen vnd trei-
bet euch / ihr sollet schreyen Abba lieber Vater / Gal.
4. Rom. 8.

Sehet vnd gedencket liebe Schwester / an an-
dere Exempla: Gott hat andern / vnd euch auch
vorhin geholffen / Er wird noch ferner / vnd auch
jetzunder helffen / erretten vnd erlösen / stärcken vnd
erhalten.

Fasset ewre Seele mit gedult / Luc. 21. v. 18.
Denn Gott ist getrew / der euch nicht lesset versu-
chen vber ewer vermögen / Sondern machet daß die
versuchung so ein ende gewinne / daß ihrs könnet er-
tragen / 1. Cor. 10. v. 13.

Ruffet

l.

m.

n.

o.